

摘藻堂四庫全書薈要

集部

欽定四庫全書薈要卷一萬四千六百三

集部

元豐類藁卷四十五

宋 曾鞏 撰

誌銘

金華縣君曾氏墓誌銘

夫人嫁王氏為侍御史諱平妻姓曾氏泉州晉江人祖諱穆殿中丞追封魏國公考諱會尚書刑部郎中集賢殿脩撰追封楚國公皆累贈太師中書令兼尚書令妣

黃氏楚國太夫人未嫁承順父母盡子道既嫁夫家貧
養姑盡婦道輔其夫盡妻道夫死寓食於穎以勤儉積
日大其家以誘教不倦成其子又可謂盡母道也蓋其
子五人回向固同罔皆有學行回有道為儒宗向罔尤
有文三人皆身在隱約而聲震天下於是時夫人兄魯
公公亮實為宰相當國然夫人處里舍彌約未嘗以為
泰及其後回向同罔皆蚤世人以為難處夫人能自廣
以理未嘗亂其志教養其孫至男有立女有歸熙寧之

間魯公告老以太傅侍中就第夫人少魯公一歲食其子祿皆居京師二人白首相顧怡然元豐元年春魯公薨四月丁卯夫人亦以疾終春秋七十有九夫人以夫恩封金華縣君以魯公恩賜冠帔子回忠武軍節度推官知陳州南頓縣事向峽州硤石縣主簿固大名府軍巡判官國子監主簿同陳州宛丘縣令同蔡州新蔡縣主簿女嫁太子右贊善大夫陳臻古孫五人泌汾汶沂潢汾郊社齋郎六試將作監主簿夫人既卒之明年某

月杲甲子葬穎之汝陰縣懷音鄉南高村祔御史之兆
其將葬也固以狀來乞銘惟夫人為子若婦為妻若母
皆盡其道於難阨流寄之中能立其家成就其子所以
自處於通塞之際者無不當於理是其智術德性過人
遠甚宜得銘且余實與其子遊最舊乃不辭而為銘曰
曾禹之苗氏自鄆子或言厥志有稱闕里或以孝顯於
經實紀或守所聞羞踐霸軌遥遥千載歷世有聞自荆
徂粵篤生夫人楚公之子魏公之孫魯公維伯御史是

嬪迺立厥家自墜而興迺教厥子自幼而成卷服貂冠
伯也在廷子也在幽碩實洪聲莫親已宗莫重夫氏兩
有其盛世誰與嬈維能既試維德實孚尚寵爾後列銘
陰墟

壽安縣君錢氏墓誌銘

劉凝之仕既齟齬退處廬山之陽初無一畝之宅一厘
之田而凝之器器然樂若有餘者豈獨凝之能以義自
勝哉亦其妻能安於理不戚戚於貧賤有以相之也凝

之晚有宅於彭蠡之上有田於西澗之濱子進於朝廷
薦於鄉閭凝之夫婦康寧壽考自肆於山川之間白髮
皤然體不知駕乘之勞心不知機獲之畏世人之所慕
者無慊焉聖人之有所不能及者獨得也其夫婦如此
可不謂賢哉熙寧九年凝之年七十有七哭其妻之喪
自為狀次其妻之世出行事來乞銘予為之因其言而
識之曰夫人姓錢氏考內殿崇班穆祖考內園使昭晟
曾祖考宣德軍節度使同中書門下平章事湛高祖吳

越文穆王元瓘夫人色莊氣仁言動不失繩墨居族人
長幼親疏間盡其宜事夫能成其忠教子能成其孝是
皆可傳者也夫人年七十有三卒於四月之庚子而葬
於其歲某月某甲子墓在南康軍西城之某原初以凝
之恩封壽光縣君再以子恕恩封壽安縣君有子曰恕
祕書丞曰格鄉貢進士皆以文學顯於世女嫁進士徐
彥伯太子中允黃廬孫某某凝之名渙筠州某人今為
尚書屯田員外郎致仕銘曰

士不苟合安於賤貧其艱其豫繇嬖有人維不終窶又
壽以康有續孔辰既庶而臧世迫而求獨優以取世懦
以處獨肆而有士也則然女實作輔考則錢媛尚配於
古

天長縣君黃氏墓誌銘

夫人姓黃氏福州福清縣人祖諱某考諱倫皆仕閩越
夫人嫁同縣林氏為殿中丞諱某之冢婦尚書屯田員
外郎諱某之妻有子曰概為太常博士集賢校理有孫

八人曰希宣州涇縣主簿編校集賢院書籍曰旦明州
象山縣令曰邵杭州南新縣令曰顏許州臨川縣令曰
稽曰雄未仕也其二人早卒有曾孫十有一人曰睿虞
虞虞虞虞據處其三人亦早卒夫人年七十有七治平
四年正月癸丑卒於京師之昭化坊累封嘉興天長二
縣君始殿中府君與其配福清縣太君鄭氏皆春秋高
安其鄉里不肯出屯田府君乃從事漳州泉州興化軍
踰二十年終養而後去夫人能盡其力治飲食衣服以

進及喪能盡其哀皆如其夫之志其子既就學夫人常
夜治絲枲居其旁以勉之至其後其子遂以文學名天
下既而其子不克壽屯田府君亦卒於官諸孫皆幼夫
人已老矣乃棲吳郡斥賣簪珥以經理其家絲蓄粒聚
至有田以食有宅以居平居日夜課諸孫以學有不中
程輒朴之及長遂多知名連以進士中其科涇縣復校
書集賢世其父職夫人乃顧諸孫謂曰吾始得事祖姑
今得弄曾孫遂保有汝家起于既墜吾老且死不恨矣

涇縣既服夫人之喪以其柩歸吳郡寶華山某年某月
某日祔屯田府君之兆而屬余銘銘曰

女職在宮行止於柔扶微救阨則匪我謀勢有孔棘義
不得寧任重子已振壞為興我儲我積乃續烝嘗我字
我飭乃襲印章蒼顛秀眉燕其作止其燕伊何維終受
祉莫仁且智疇濟登茲播告無極視此銘辭

仁壽縣太君吳氏墓誌銘

仁壽縣太君撫州金谿吳氏尚書都官員外郎贈尚書

刑部侍郎撫州臨川王公諱益之夫人衛尉寺丞諱用之之婦年六十有六嘉祐八年八月辛巳卒於京師十月乙酉葬於江寧府之蔣山夫人好學強記老而不倦其取舍是非有人所不能及者然好問自下於事未嘗有所專也其平生養舅姑甚孝蓋侍郎七子而少子五人吳氏出也然夫人之愛其長子甚於少子曰吾愛之甚於吾子然後家人愛之能不異於吾子也故其子孫已壯大有不知為異母者居久之二長子前死夫人已

老矣每遇其嫠婦異甚而身為字其孤兒忘其力之憊也其處內外親疎之際一主於恩有讒訕踞罵已者數困苦常置之不以動聲色亦未嘗有所含怒於後也有以窮歸已者急或分衣食不為秋毫計惜以其故至不能自給然亦未嘗不自若也其嫁三從之孤女如已女而待長子之母族如已族蓋篤行如此而天性之所有也其自奉養未嘗擇衣食其視世俗之好無足累心者方其隱約窮匱之時朝廷嘗選用其子其子堅讓至於數十

或謂可強起之夫人曰此非吾所以教子也卒不強之
及處顯矣其子嘗有歸志而以不足於養為憂夫人曰
吾豈不安於命哉安於命者非有待於外也其子為知
制誥故事其母得封郡太君夫人不許言故卒不及封
此夫人之德見於行事之迹而余以通家故熟於耳目
者也夫人之考諱畋畋之配黃氏兩人者皆有善行鄉
里稱之而黃氏兼喜陰陽數術學故夫人亦通於其說
七子者曰安仁安道安石安國安世安禮安上安仁宣

州司戶叅軍安石尚書工部郎中知制誥安世太平州
當塗縣主簿安禮大名府莘縣主簿餘未仕也女三人
長適尚書虞部員外郎沙縣張奎次適前衢州西安縣
令天長朱明之次適楊州沈季長孫男九人曰雱粦旁
旂旒防旂旂放孫女九人長適解州安邑縣主簿徐公翊
次許嫁太廟齋郎吳安持餘尚幼銘曰

嗟若人兮洵好善兮始終一德仁七子兮遺棄細故篤
九族兮脫珥推食光惠施兮以義易利能無累兮縱心

委命志彌邵兮謂宜百歲奄忽逝兮風有采蘋經所首
兮原念美實輯此辭兮庶幾德音與古對兮

壽昌縣太君許氏墓誌銘

夫人許氏蘇州吳縣人考仲容太子洗馬兄洞名能文
見國史夫人讀書知大意其兄所為文輒能成誦父母
衣食服御待之而後安既嫁惇行孝謹宜於其家其夫
為吏有名稱夫人實相之及春秋高於內外屬為高曾
之行而慈幼字微愈久彌篤故親疏懷附無有惡數昔

先王之治必本之家達於天下而女子言動有史以昭
勸戒後世以古為迂為政者治吏事而已女子之善既
非世教所獎成其事實亦罕發聞於後其苟如此其衰
微所以益甚則夫人之事其可使無傳也哉夫人嫁沈
氏其夫諱周太常少卿贈尚書刑部侍郎其舅諱某贈
兵部尚書杭州錢塘人夫人封六安縣君壽昌縣太君
年八十有三熙寧元年八月丁巳卒於京師二年八月
某甲子合葬杭州錢塘縣龍車原子曰披國子博士有

吏材曰括揚州司理叅軍館閣校勘有文學其幼皆夫
人所自教也女二人蚤卒銘曰

生民之治必本於身教行於家餘以為人世弊俗偷恕
於在已內替常度外彊於理淑惟壽昌學與心成篤於
孝慈匪勸而能有翼於夫有迪於子尚類古人其傳以
此

德清縣君周氏墓誌銘

夫人姓周氏湖州長興人曾大父諱某大父諱某父諱

某嫁同縣陳氏為祕書省著作佐郎諱某之妻為人柔
嫗靜莊在父母家至歸於夫氏本於自脩而卒於能孚
於屬人陳氏有姒婦寡居當家事夫人常曲意下之於
事常退避不敢與姒婦以其故顧夫人甚懼而親疏觀
者莫不悅著作有田數千畝而愛士好施夫人常悉力
助之以其故至不能自給而夫人處之自若遇子之非
已出者與已子無毫髮厚薄意人以為過人而夫人若
有所不及也享年三十有五封德清縣君子曰樞為尚

書屯田員外郎曰楷曰權未仕也卒於慶厯五年之二
月辛丑葬於熙寧三年之三月庚申其墓在長興縣永
昌鄉卞山之陽銘曰

嗟淑人體明德外惟均內自克不永年隕嬪則兆親宮
藏石刻

夫人周氏墓誌銘

夫人諱琬字東玉姓周氏父兄皆舉明經夫人獨喜圖
史好為文章日夜不倦如學士大夫從其舅邢起學為

詩既嫁無舅姑順夫慈子嚴饋祀諧屬人行其素所學
皆應儀矩有詩七百篇其文靜而正柔而不屈約於言
而謹於禮者也昔先王之教非獨行於士大夫也蓋亦
有婦教焉故女子必有師傅言動必以禮養其德必以
樂歌其行勸其志與夫使之可以託微而見意必以詩
此非學不能故教成於內外而其俗易美其治易洽也
茲道廢若夫人之學出於天性而言行不失法度是可
賢也已其夫來乞銘予與之親且舊故為之序而銘之

蓋夫人之王父諱協為尚書刑部郎中父約今為尚書
虞部員外郎青州益都人也夫人嫁闕氏為徐州豐縣
令景仁之妻為尚書職方員外郎贈尚書都官郎中諱
魯之子婦生一男二女年二十有六卒於治平二年之
九月某甲子葬於杭州錢塘縣履泰鄉葛松原實某
年某月某甲子闕氏錢塘人也銘曰

女有圖史傳於師氏其勸以樂其康以禮能此非他繇
學而已王政之興蓋自此始今孰登茲維周之媛學繇

自好終之不倦言循於矩行循於典尚配古人輝光日
遠

永安縣君謝氏墓誌銘

宋故衛尉寺丞王公諱用之之夫人尚書都官員外郎
贈尚書工部郎中諱益之母姓謝氏累封永安縣君其
卒皇祐五年之六月十四日其葬於撫州金谿縣某鄉
某原既卒之百有五十日也其子曰益曰某皆已卒
曰某曰某曰益楚州司理叅軍亦已卒其孫曰安仁宣

州司戶叅軍曰安道皆已卒曰安石殿中丞通判舒州
曰沆荆南府建寧縣令曰安國曰安禮其曾孫曰某曰
某曰某其墓工部故人之子曾鞏誌之曰王氏由工部
之叔父尚書主客郎中贈太常少卿諱觀之始起家為
能吏遂追榮其父諱某為尚書職方員外郎至於工部
父子遂皆進於朝為聞人其世寢大夫人及拜其舅與
夫之榮而享其子與孫之祿其壽至於九十其卒於
撫州之臨川安於其寢余既與夫人之諸孫遊而嘗得

拜於堂上見其色和其容謹聞其言儉而勤退而聞其
為婦順為母慈知其所以享其福祿者其宜也已余觀
詩人之歌其后妃至於諸侯大夫之妻內脩法度輔佐
其夫而其效之見則免置之人至於江漢汝墳之婦女
皆承其化而篤於禮余故歎其當是之時上下之間內
外相飭何其至也如夫人之賢而使出於其時則必有
歌於風而被之於無窮之事若余之鄙其亦曷能知其
所至也哉謝氏之祖曰某考曰某銘曰

士顯其施其行易知女處於私其有孰窺嚴嚴秀眉不見缺虧曷以長之視此銘辭

永安縣君李氏墓誌銘

夫人姓李氏其先燕人而今家許州之長葛贈太子太傅諱譚之曾孫贈禮部尚書諱運之孫贈刑部尚書諱昌言之女而母晉平縣君聶氏也夫人嫁駱氏駱氏亦家許州之長葛其夫諱與京為某官檢校某官知某州享年七十有九封永安縣君有子男四人長吉逢吉元

吉皆三班奉職早卒嘉福今為右班殿直女三人亦早
卒夫人以嘉祐八年十一月丙辰卒於其家之正寢而
以熙寧二年十月葬於許州長社之舞鸞鄉白兔里祔
駱侯之塋夫人仁孝慈恕言動必擇義理事父母不違
其教事舅姑不違其志事夫順而有以相其善遇子至
於內外屬人一以恩而不違於禮初刑部之兄昌齡當
太宗真宗時輔朝政李氏族大而貴然刑部嫁女常擇
寒士而至其後多為名臣范文正公仲淹鄭文肅公戩

與駱侯是也夫人之弟光祿少卿禹卿余妻父也實葬
夫人故屬余銘銘曰

性有能否行有失得一當於理士有不克淑哉夫人秉
是壺彛周旋大小無過無虧貴不稱德壽則謂遐維藏
在許永裕厥家

試祕書省校書郎李君墓誌銘

君諱迂字明遠姓李氏為人孝友慈恕讀書務大旨生
五代之際再試明經不合退居楚丘有田百餘頃皆推

與其族人獨留五頃而已曰無令子孫以財自累也宋
初祕書監彭君薦其行義詔以為試祕書省校書郎而
君終不肯強起淳化三年壬辰九月二十一日以疾卒
於家享年八十有四維李氏遠出於皋陶而其後李耳
之孫曇為秦司徒曇子璣璣子牧事趙始家趙郡牧子
汨汨子左車於趙號廣武君廣武君子遐涿郡太守遐
子岳諫議大夫岳子秉潁川太守又徙家潁川秉七世
子膺河南尹膺子瑾復家趙瑾曾孫楷晉治書侍御

史有子五人曰輯是芬勁獻以所居巷東西自別故勁
稱西祖勁子隆後魏阜城令隆後九世棲筠御史大夫
贊皇文獻公文獻公子吉甫相憲宗吉甫子德脩楚州
刺史德裕相文宗武宗楚州子煜宋州宋城令君曾祖
也又徙家宋之楚丘故今為楚丘人宋城子確萊州膠
水令君祖也膠水子譚磁州邯鄲令君考也邯鄲之少
子運為太常少卿有子曰昌齡太宗真宗時為尚書戶
部侍郎叅知政事故膠水贈太子少保邯鄲贈太子少

傳君娶丁氏王氏有子曰昌震為建州松溪令贈
尚書駕部郎中駕部有子曰漢卿今為諸王府侍講尚
書虞部員外郎虞部有子曰彥龍彥龍復有子四人矣
君卒後七十四年治平三年丙午四月某甲子虞部葬
君於開封府開封縣保安鄉永寧里之原以王夫人從
銘曰

不累於物全吾質兮不羈於世遂吾志兮作宅新原維
孝孫兮納銘幽局永淑聲兮

試祕書省校書郎李君妻太原王氏墓誌銘

夫人姓王氏太原人嫁趙郡李氏為磁州邯鄲令贈太
子少傅諱譚之冢婦試祕書省校書郎諱迂之妻為人
明識強記博覽圖籍子孫受學皆自為先生其行仁孝
慈恕始於為女中于為婦終於為母無不盡其道享年
八十大中祥符三年庚戌十二月己巳卒於虢州盧氏
縣其子之官舍子曰昌震建州松溪令贈尚書駕部郎
中駕部子曰漢卿今為諸王府侍講尚書虞部員外郎

虞部嘗為李氏九世譜其博而詳多夫人之所為言也
治平三年丙午四月丁酉虞部以夫人之喪從校書君
葬於開封府開封縣保安鄉永寧里之原銘曰
嗚呼夫人既有其質又肆爾力古有遺辭罔不采獲克
踐以躬亦畀爾息維痊有銘尚以載德

池州貴池縣主簿沈君夫人元氏墓誌銘

夫人姓元氏錢塘人祖諱德昭事吳越國王錢氏宋興
贈太保考諱好文尚書比部員外郎贈某官嫁吳興沈

氏其舅為尚書屯田郎中諱某

一作王

其夫為池州貴池

縣主簿諱播夫人在父母家內外上下親疏長幼皆宜之年十有七而嫁既嫁如在父母家時貴池君早世無兄弟太夫人春秋高諸子尚幼夫人年三十餘於羈旅單獨之中闔門事姑能盡其孝教養諸子至其後皆為成材能世其先人方其憂戚難阨之時人恐其不能堪夫人既奮厲經理以保有其家又退能自安不亂其志是人之所難而其後世之不可以無述者也夫人年七

十以治平二年某月某日卒卒之若干日葬真州楊子縣甘泉鄉三城里北山之原子男四人皆進士曰伯莊未仕曰季長越州司法叅軍曰叔通祕書省著作佐郎曰次通試將作監主簿貴池君於先人為同年友而諸子又與余遊故為銘銘曰

元出於危於東得姓有保有郎重世之盛允淑夫人集享家慶來嬪沈宗作德維令處平不盈在險能正姑曰微婦余老誰據子曰微母余幼誰怙自振單弱卒持艱

急老肆而安幼強以立實保沈宗自替而昌有烈如此
何愧烝嘗後世原美孰可無述刻辭幽宮庶幾不沒

雙君夫人邢氏墓誌銘

夫人邢氏無為軍巢人也嫁為贈大理寺丞姓雙氏諱
華之妻封萬年縣太君子男三人曰漸為尚書屯田員
外郎通判吉州軍州事餘未名皆早夭夫人年八十有
六嘉祐四年九月二十七日卒於宣州之官舍六年十
二月二十七日葬於無為軍巢縣無為鄉惲良里之原

方大理府君之在隱約屯田始就書學夫人能經理其
家使無內憂以卒就其志及屯田有列於朝夫人食其
祿養就封大縣實受成報天之施與善人豈非信哉夫
人之在疾也屯田之配長壽縣君陳氏共養營救有過
人之行州上其事天子聞而嘉之勅州使致粟帛賜其
家於是人知夫人之善不獨能成其子又能化其家也
銘曰

允淑夫人秉是壺彝有韞車服維寵嘉之葵有卜壤

其吉在斯推求美實眎此銘辭

旌德縣太君薛氏墓誌銘

夫人姓薛氏累封旌德縣太君為故太子右清道率府副率致仕贈右監門衛將軍姓段氏諱某之妻今提點江南東路刑獄公事禮賓副使名某之母某州某縣人也大父諱某當吳越錢忠懿王時娶王女為王國官父諱某祥符初為東頭供奉官供奉常將屯宮門而監門之父右班殿直諱某者屯三陽二人者以意氣喜相

得也遂以夫人歸段氏夫人性柔淑能和其屬人自珮服櫛珥凡資已者常出於儉而有餘好施雖盡費不以為侈也生男一人禮賓也女二人長適開封黃思問次適吳郡潘孝孫皆進士夫人年四十有三大中祥符七年五月某甲子以疾卒於京師之敦教坊某年某月某甲子祔其夫之柩葬於某州之某縣某鄉某所之原前葬禮賓稱夫人之行與其世序封號之詳託銘於南豐曾鞏為述而銘之曰

約乎已厚乎人發其憤在子孫韓分翟列封君砧兮石
琢銘文

永興尉章佑妻夫人張氏墓誌銘

夫人姓張氏建安人父諱士龍舉進士嫁同郡章氏為
永興尉佑之妻所出三男四女曰造适述皆舉進士造
及第為清海軍節度掌書記女嫁俞瑾徐立之陳震亦
皆舉進士其一蚤死初永興府君起家二十年止於為
尉及死三男尚幼造既起又蚤死已而适亦死夫人維

能忘其貧所以使其夫能屈於小官而說維能務其生
所以使其子能安於幼學而成維能順其性所以居流
離顛頓之間而不為悲哀愁憂亂其志也其為人卑極
於順其為人尊極於慈推於其疏宗遠屬之間極於愛
男之有不能葬者為葬之女之有不能嫁者為嫁之忘
其力之匱而為之也此皆古今學士儒者所難而女子
之善能如此此非可銘者歟嘉祐二年十一月三十日
卒於洪州之私第即以其年十二月十八日葬於洪州

某州之某鄉某原銘曰

彼以吾窮我以吾仁二者皆天吾樂而因壽止七十豈
不得年維其有之愈遠彌傳

福昌縣君傅氏墓誌銘

福昌縣君姓傅氏會稽人尚書職方員外郎霖之女同
郡尚書職方員外郎闕公魯之妻後闕公五年至和三
年二月丙申卒於家年六十有四子男八人景榮景元
景仁希聲杞景山景宣景良女一人景華嫁著作佐郎

史叔軻福昌君在家為父母所器異既嫁而夫屬無退
言布衣惡食身治細微故闕公之祿及其疏昆弟姊妹
之孤其事闕公正以從其教子慈以肅闕公起進士為
郎為池台兩州年八十以歸曰吾少得盡力於官而老
得自休於家不以家事累吾志者以有夫人也八子學
行脩立景茶希聲杞同時皆中進士夫人之卒景茶為
江陰尉希聲寶應尉杞和州判官景元亦以父恩為廣
德尉皆能其官景仁而下皆有聞於人實受教於夫人

也始闢公既貧而孤其仕與婚又皆後至其終有百口
為大家福昌君維厚勤薄養所以經理其微維可否以
明行止以公善訓能使誠恕愛人所以使其家有節法
以有其成也某月甲子從葬錢塘之某源其子來屬以
銘景宣子妹婿也宜為銘其辭曰

闕氏爰昔始如萌芽台州奮拔垂實敷華進勤退佚不
卹其家繇嬖有人作其內治孰致其休不懈於勸孰致
其隆不簡於細高明純約坦坦其夷無怨無疵小大化

之有容有則婦子順之公為朝老子官以成象衣華輅
我止我行魏冠文笏我翼我承公曰微子誰據誰依子
曰微母莫濟登茲云誰無母其孰無妻為妻為母如我
誰亢生雖有止存也其長鴻鴻號聲垂此銘章

沈氏夫人墓誌銘

夫人姓沈氏其先家於越之會稽曾祖仁諒令海州之
朐山徙家於和州歷陽故今為歷陽人祖平贈尚書刑
部侍郎父立今為右諫議大夫判都水監母馮氏濮陽

縣君董氏仁壽縣君夫人年二十有二嫁揚州進士朱

延之有子三人寅萬廣女五人尚幼夫人年四十有五

卒於熙寧元年十一月之庚辰葬於某年某月之某甲

子其墓在揚州天長之秦蘭里夫人為人柔閒靜專事

父母盡子道事姑長興縣太君賈氏盡婦道事夫盡妻

道為母及與內外屬人接一皆盡其道故其處也愛於

其家其嫁也夫之屬人上下遠近皆愛之而其歿也哭

之者皆哀是不宜無銘而朱君余舅也屬余銘銘曰

媛維沈女經德以身柔嫗靜簡一作間孚於屬人維祉在

後有子詵詵瑑詩告美愈遠彌新

壽安縣太君張氏墓誌銘

夫人姓張氏濟州鉅野人嫁為同郡尚書駕部員外郎
贈開府儀同三司吏部尚書晁公諱邁之夫人而為贈
太傅諱佺之子婦有子男四人曰宗曜進士曰宗恪光
祿少卿曰宗愿真州軍事推官曰宗懿尚書司門員外
郎女一人嫁進士桑況夫人初封清河縣君累封清河

壽安縣太君年八十有七卒於熙寧二年之十一月某

甲子葬於某年之某月某甲子其墓在開封府祥符縣
旌孝鄉合儀同之兆卒時子宗曜宗愿皆已死既而光
祿居喪以疾亦死而諸孫男女凡三十人男多已仕女
多已嫁矣夫人為人仁厚莊靜自為女及既嫁處內外
親尊卑長幼親疏之際無不當於禮而恩稱之其長者
皆以為善事我而平居為等夷及少者莫不願以為歸
也雖老未嘗懈而雖疾未嘗有惰容維其初終受養被

封既壽而康實備成福可謂盛矣余之亡妻於夫人之
孫女為第三而光祿之長女也知夫人之行為尤詳故
為之銘曰

女婉張氏處躬以厚來嬪晁宗太傅維舅儀同維夫卿
士維子有孫詵詵亦紹厥美累封備養維康以壽德則
既成福亦多有納詩新藏尚告爾後


元豐類藁卷四十五

謹案卷十四第七頁後五行諱杭按宋文鑑杭
作抗

第八頁後四行孫氏來黥刊本氏訛世據宋文鑑
改

卷四十五第七頁前八行其子堅讓至於數十刊
本脫其子二字據文章正宗增





總校官進士臣胡榮

校對官編修臣楊壽楠

謄錄監生臣熊輝

欽定四庫全書薈要

集部

元豐類藁卷四十六

七

詳校官助教臣常循



欽定四庫全書薈要卷一萬四千六百四

集部

元豐類藁卷四十六

宋 曾鞏 撰

誌銘

亡兄墓誌銘

君姓曾氏諱華字茂叔有智策能辯說其貫穿反覆人莫有能屈之者身窮為生事或毛密應之無留而讀書理筆墨交賓客又思事未至當何如亦不廢也歡愉憂



悲疾病行役寢食之間書未嘗去目故自上古以來至今聖賢百氏騷人材士之作訓教警戒辯議識述下至浮夸詭異之文章莫不皆熟而於治亂興亡得失是非之際莫不能議焉其文章尤宏瞻瓌麗可喜三代遠矣漢以來世有成事業就功名之時則賢臣謀士材技之人同世並出常若有餘至時或無所用之則士雖往往有紀而亦不俱見於世盖墮窮頓委於巖墻閭巷之中者豈少哉如君之材知辯博又其學如此使得用其意

於事其施設必有異焉然卒不克見於世蓋亦豈非其
命也夫君年四十有五皇祐五年以進士試於廷不中
得疾歸卒江州祖諱某尚書戶部郎中贈右諫議大夫
考諱某故太常博士娶李氏子曰覺曰蠻女二人卒之
歲十二月某日葬建昌軍南豐縣之某鄉某原某里也
弟鞏為其銘曰

世或湏人中士為材有非其應聖不能諧故君之學於
已為足而材與世為乖刻銘幽石維以告哀

故高郵主簿朱君墓誌銘

君諱某字齊卿姓朱氏其先家於彭城五代之亂徙於淮南今為淮南人曾祖某不仕祖某贈刑部尚書父某贈殿中丞君嘗試為秘書省校書郎蘇州之長洲尉高郵軍之高郵主簿以卒卒時乾興元年六月十九日也後卒之若干年其子象之東之升之延之奉君之喪葬天長縣之秦蘭里於是時象之某官東之某官以材名餘皆為士某官以書命輦曰予其為我銘之而以狀言

公之為人有智計喜施與少從師學問已而捨學業其
家家之食口數百仰於君君能資之凡出乎衣食嫁娶
皆有餘法殿中之第工部侍郎異初舉進士數困欲不
復往君勸之曰第行無以廢為念故侍郎得曲就其志
至為達官大其家後卒官君既居官以材稱其為身務
於廉臨獄訟務為恕母某氏旌德縣太君娶耿氏又娶
賈氏女歸太常博士吳祥柳州馬平知縣陳許池州推
官李樞其季歸于曾氏某之先君博士也舅氏實命鞏

銘其敢辭銘曰

推心於家其愛已孚用力於官蓋以其餘得官於晚壽
五十四故不大顯以極其志

江都縣主簿王君夫人曾氏墓誌

試校書郎揚州江都縣主簿王無咎妻曾氏建昌南豐
人先君博士第二女也孝愛聰明能讀書言古今知婦
人法度之事巧鍼縷刀尺經手皆絕倫先君選其婿於
里中以歸王氏王氏家故貧曾氏為冢婦而其姑早世

獨任家政能精力躬勞苦理細微隨先後緩急為撙節
各有條序有事於時節朝夕共賓祭奉養撫其門內皆
不失所時將以恭嚴誠順能得其屬人其舅喜曰吾不
以家為卹矣其夫歡曰我能一意自肆於官學不以私
累其志曾氏助我也生二女年三十有三嘉祐四年五
月三日以疾卒十二月葬建昌南城曾大考尚書水部
員外郎諱仁旺大考右諫議大夫諱致堯先君太常博
士諱易占將葬江都告其兄輩使誌其墓天乎吾哭伯

姊始踰期又哭吾妹而誌之其可哀也已其可哀也已

鄆州平陰縣主簿闕君妻曾氏墓表

鄆州平陰縣主簿闕君景暉妻姓曾氏建昌南豐人尚書水部員外郎諱某之曾孫尚書戶部郎中直史館贈右諫議大夫諱某之孫太常博士諱某之女而鞏之長妹也始吾妹為兒時育於祖夫人已不好戲弄及長喜讀書於女工之事不教而自能為人進退容止皆有法度人罕見其喜愠之色內外屬皆嚴重之性儉素於紛

華盛麗之際無所好其在父母及夫之家或蔬食不給處之晏然其推之於人雖資身之物不為秋毫顧惜計也其治女事尤勤雖勞不厭治家人之業雖煩細皆有條理養父母姑舅皆至孝姑久疾晝夜候省未嘗須臾去其側藥食非親調不以進其於內外屬親疎皆盡恩意人皆以謂宜富貴壽考而卒不得至其所宜有嗚呼其豈非命也歟嘉祐二年鞏與二弟得進士第南歸而吾妹從景暉視余於淮南至真州得疾七月某日卒於

余之舟中年三十有二矣有女一人曰某始五歲景暉
以其喪歸六年十月丁酉葬於杭州錢塘縣履泰鄉龍
升原景暉之皇考諱某考諱某皆尚書職方員外郎而
越之山陰人也吾妹既沒之六年景暉得進士第於
是時余校史館書籍皆會京師而余於其間再哭妹
又哭女與哭妻憂患之接於余者可謂多矣景暉之始
葬吾妹也來請銘不及余與之皆恨焉而其會京師以
歸也乃為之書吾妹之事以遺之而使表之於其墓上

故太常博士吳君墓碣

君諱祥字某始吳氏事宋為太常博士年六十二某年某月某日以官卒于家卒之若干日葬真州揚子縣之某鄉某原初君從進士試屢不中年四十餘始中第為吉州軍事推官歸以選為開封府開封縣丞大臣稱其材遂為秘書省著作佐郎知考城縣又知河中府之龍門縣再遷為博士知蘄州之蘄水縣父喪除朝京師疾作遂求歸真州真州君家也初君之屢斥於進士也既

自力學問充其業又率其弟務刻苦養其親入其門內
尊安其卑卑慕其尊一時皆稱之及從事於吉州弟已
死君夫婦痛自節衣食遂能嫁其孤女若干人皆不失
所時其在開封衣食常不自足而親戚舊故之至京師
者多以君為歸其喪父也以家之有無葬故葬不緩親
戚或憂其貧欲出錢為基址謂君一強出可以取其贏君
歎曰吾不敏既位於朝貧吾素也喪乃欲為利乎平居
恂恂不與犯者校及其自守人亦不能移也官歸常僦

屋以居既卒幾不能葬曾大父某大父某父某以君之
恩為大理評事妣某氏某縣太君太君之喪君致其哀
有過人者妻朱氏某縣君余姨也有助於君子曰某女
嫁亳州觀察推官張天經既葬某為碣於墓而與天經
來乞銘於鞏天經以材名人皆曰其尚能存君之家者
銘曰

維吳先君太王之嫡禪聖圖民於東竄跡其後孔蕃以
國為氏君紹厥宗其德則類儉著於家勤著於身不苟

其羸卒死於貧維時之人命士大夫縞冠素蓋爭利於塗曾不君慕顧或笑之非彼可議維世足欬較於銘章君有則多以遺其孥非厚如何

知處州青田縣朱君夫人戴氏墓誌銘

知處州青田縣事天長朱君諱某之夫人曰高郵戴氏年七十有七治平元年九月庚午以疾卒於楚州監倉之官舍某年某月某甲子葬于天長之某鄉某原夫人之考諱奎娶徐氏女夫婦皆有善行聞於其鄉夫人受

教於始笄從事於既嫁少而行脩於身老而教行於家
故父母曰不遺吾憂舅姑曰能順吾志夫受其助子賴
以成其平居深靜有儀法不妄笑言就之色莊而氣仁
居貧自薄衣食而厚於施與屬人之孤女為收嫁者盖
二人云既老矣女事不廢而婦容益恭雖少者有不及
也有子四人曰某曰某曰某早卒某某州錄事參軍監
楚州裝卸米倉某衢州西安縣令皆及進士第好古而
有文夫人於某外叔祖母也故舅氏屬以銘銘曰

淑哉戴氏青田之助允直且仁蓄德于身為下肅祇為
上惠慈安意處貧薄已裕人其承有子以文起仕秀髮
垂領享有多慶卜壤之良乃兆新堂刻此幽文美實長
存

亡姪韶州軍事判官墓誌銘

覺姓曾氏吾兄之子也吾先人六子吾兄諱畢為最長
有材而不試以死覺自少則勵志力學問知道理善於
屬文及長慨然慕有為於世不肯碌碌為人恭謹循循

寡言治平二年及進士第為吉州司法參軍有能吏名
用薦者為韶州軍事判官行至虔州得疾卒於驛舍熙
寧三年十一月己丑日也年三十有七覺字道濟建昌
軍南豐人高皇考諱致堯太常博士曾皇考諱易占尚
書戶部郎中直史館贈右諫議大夫覺母李氏妻鄧氏
夏氏范氏有子修偃熙寧四年八月壬申葬於南豐龍
池鄉之源頭吾哀其若將有成也而止於斯故為銘其
墓曰

德累則厚方濟而隕材引則達未試而泯志氣不獲誰
云非閔墓石有文尚永來信

光祿少卿晁公墓誌銘

公姓晁氏其先家濟州之鉅野今為開封祥符人皇考
諱邁尚書駕部員外郎贈開府儀同三司吏部尚書皇
祖佺贈太傅皇曾祖諱憲贈某官公諱宗恪字世恭少
以世父太子少保贈某官謚文元諱迴恩補將作監簿
十四遷至光祿少卿歷監單州應天府酒稅知蘇州之

常熟婺州之蘭溪縣事通判安州杭州事知通州虔州
提點廣南東路刑獄公事又知信州泉州享年六十有
三熙寧二年某月某甲子卒於官四年某月某甲子與
其夫人某縣君閭丘氏合葬於揚州江都縣之廣陵鄉
公為人樂易慈恕寡言笑人不見其喜怒遇事果於有
為人亦罕能及者其為常熟修學校理溝防人賴其利
為蘭溪繩奸字窮境內和洽通判安州安州政待公而
決通判杭州州將矜已自肆上下莫能變公徐與之論

可否語平而氣和將畏且從也由是上下倚公以治至今杭人稱之其為虔州州近鹽多盜與訟公至修弛廢督奸彊威信盛行盜不敢發而獄無繫囚及在廣南其用法常寬而欲人自避曰治有先後緩急者謂此也其視部吏孜孜恐失一善而惡人亦莫敢犯公法其為通判如廣南為信州泉州如虔州所至人皆安公之政而去常思之蓋公之行已居官而見於事者如此而其大抵則於仁厚最隆也母張氏壽安縣太君子男二人曰

仲景海州司理參軍曰仲孺試將作監主簿孫男三人
曰端復曰端儼皆太廟齋郎曰某未仕也女六人長適
太常博士集賢校理曾鞏銘公墓者也次適某官劉某
某官高元振某官燕若濟今存惟燕氏婦餘早世閭丘
夫人為身治家皆應儀度卒於公沒之明年某月某甲
子公沒家無餘財而仲景仲孺皆謹厚自刻勵能世其
先人於是又知公之教行於其家也銘曰

晁世來西大自文元有卿有公繼屬綿綿曰卿謂誰時

維光祿作其德音光於外服其光伊何有善自身匪飾
匪雕璞玉之純治有恩威時其張弛彼畏此懷吾寧一
理于虔于泉于嶺之南里安戶擾罔有不咸宜壽而昌
胡不百齡尚茲介祉維後之成

夫人曾氏墓誌銘

夫人吾從女兄也姓曾氏沉靜謹約不妄笑言遇人一
以恕於其內外屬之間孝友慈順無不當于理故與之
處者皆愛哭其死者皆哀嗚呼為女如是足以知其賢

又足以知吾之祖考以來教行於其家也夫人考諱某
王考諱某尚書戶部郎中直史館贈右諫議大夫曾王
考諱某尚書水部員外郎建昌軍南豐人夫人嫁為同
縣朱君某之妻有子曰軾曰某軾以文行稱於鄉有孫
曰京曰彥京為真州司法參軍亳州教授夫人享年若
干某年某月某甲子卒于寢某年某月某甲子葬于南
豐之某鄉某原將葬軾以書來請銘余曰銘莫如余宜
為廼為其辭曰

女德在幽而始人倫詩有顯揚以立生民尚類于古淑
為夫人壺有彛則仔肩以身曾不蕃寵畀其子孫曾不
遐年善則長存維仲薦美列辭墓門

天長朱君墓志銘

君姓朱氏諱延之字某其先彭城人今家於揚州之天
長縣曾祖某贈尚書右僕射祖某贈尚書工部侍郎考
某贈太子中舍母賈氏某縣太君君年若干卒于熙寧
六年六月之丙申葬于某年某月之某甲子其墓在天

長之同人鄉秦蘭里君聰明敏悟少力學問為文章數就進士試不合乃嘆曰與其屈於人孰若肆吾志哉因不復言仕方是時朱氏世以仕宦顯於淮南君居其家尤孝謹慈良然與人非其意不肯苟合既果於自為而其治見於家者規畫纖悉備具推之知其可任以事然卒於無所遇君亦未嘗不自得也君少孤養母母之父死歲久其喪寓於遠貧不能歸也君居窮經營卒能使之返葬及晚而饒財又能樂賑施人以此多君也君娶

沈氏諫議大夫立之女早卒再娶王氏殿中丞鼎臣之
女子男四人寅萬廣寓皆有學行女五人許嫁進士滿
希遠太廟齋郎馬某餘尚幼君余舅也故為之銘其墓
其辭曰

勢不云泰志則非屯彼穀之丹豈易吾仁廩有餘粟及
里與隣藏有圖書遺其子孫已則無憾尚畀後人識美
幽室日遠彌新

祕書省著作佐郎致仕曾君墓誌銘

君姓曾氏諱庠字明升建昌府南豐縣人曾祖諱某尚書水部員外郎祖諱某尚書戶部郎中直史館贈右諫議大夫考諱某舒州軍事推官君進士及第歷邵州司理參軍用薦者為衡州常寧縣令福州福清縣丞以疾自陳遷秘書省著作佐郎致仕卒於熙寧九年十月某甲子年五十有九以其年十一月某甲子葬南豐龍池鄉之源頭母吳氏妻黃氏朱氏有子曰擴曰某曰某女四人君少孤自感勵好學能文章為人聰明敏達喜事

有大志不肯少屈為吏以材稱治獄能盡其情為令丞
易樊興壞綱紀具修吏不敢犯而民安之也有聲顯聞
薦者自許得人不幸不壽不克盡其用將葬擴來告曰
願有紀也乃為其銘曰

發其華見於文收其實見於事于其小綽有聞于其卓
屈不試尚不沒惻後昆夫以辭列幽隧

亡妻宜興縣君文柔晁氏墓誌銘

文柔姓晁氏諱德儀字文柔年十有八嫁余余時苦貧

食口衆文柔食菲衣敝自若也事姑遇内外屬人無長少遠近各盡其意仁孝慈恕人有所不能及於櫛珥衣服親屬人所無輒推與之不待已足於燕私未嘗見其情容於與人居未嘗見其喜愠折意降色約已以法度學士大夫有所不能也為人聰明於事迎見立解無不盡其理其概可見者如此盖天畀之德而夭其年遺以相余而奪之蚤余不知其所以而又不自知其哭之之慟也文柔以嘉祐七年二月甲子卒於京師年二十有



六余時校史館書熙寧二年追封宜興縣君十年二月
庚申葬于建昌軍南豐縣龍池鄉之源頭余時為洪州
文柔有子男曰綰太廟齋郎曰綜未仕也女慶老三歲
而死晁氏世家澶州清豐縣今為開封府祥符縣人文
柔曾祖佺贈太師中書令祖邁尚書駕部員外郎贈開
府儀同三司吏部尚書考宗恪光祿少卿余南豐曾輩
子固也銘曰

人孰不貴子逢其窮世誰不壽子罹其凶維德日躋生

不見其止維聲日遠沒不見其終子能自得懟者在人
遺以輔余曾不逡巡歲云其逝予悲孔新其孰昭之琢
此幽珉

亡弟湘潭縣主簿子翊墓誌銘

熙寧十年春予蒙恩予告葬其弟子翊於南豐維子翊
姓曾氏諱宰字子翊世魯人今家建昌軍之南豐子翊
少力學六藝百子史氏記鍾律地理傳注箋疏史篇文
字目覽口誦手抄日常數千言手抄書連榻累笥不能

容於其是非治亂之意既已通至於法制度數造物立
器解名釋象聲音訓詁纖悉委曲貫穿旁羅無不極其
說且老未嘗易意其為文馳騁反復能傳其學為人質
直孝弟抑畏小心少年飲酒歌呼饒樂放縱之事未嘗
一接焉其學行如此於世用宜如何也然位不過主簿
壽止於四十七其非可哀也夫子翊嘉祐六年進士及
第歷舒州司戶參軍潭州湘潭縣主簿所居官理其去
人思之其學於古者蓋未嘗試也有子經綬純約女適

饒州軍事判官曹唐弼次尚幼也曾祖諱某尚書水部
員外郎祖諱某尚書戶部郎中直史館贈右諫議大夫
考諱某太常博士贈尚書都官員外郎先太夫人吳氏
吳興郡太君今太夫人朱氏南昌郡太君妻張氏子翊
熙寧元年四月乙巳卒於湘潭十年三月庚申葬于南
豐龍池鄉之源頭銘曰

好學不倦以及其詳力行不已亦蹈其常見於遺文華
袞之章含其淳德璞玉之良于舒于潭非試其有方彊

而盡又奪其壽畜而不施則既已矣潛而益明尚監於此

曾氏女墓誌銘

先君太常博士贈尚書都官員外郎曾公之第八女諱德耀字淑明生而慧淑於女工不學而能于孝愛天成也生二十歲許嫁大理寺丞王幾行有日矣嘉祐六年九月戊寅以疾卒於京師熙寧十年三月壬申葬南豐之源頭其兄輩為銘曰

孰訛爾質而伐其成尚千萬年爾室之寧

二女墓誌銘

南豐曾氏葬其二女其父輩為誌曰予校書史館凡九年喪女弟喪妻晁氏及二女余窮居京師無上下之交而悲哀之數如此二女曰慶老吾妻晁氏出也生三歲而天實嘉祐六年十一月壬申方是時吾妻晁氏病已革慶老疾未作之夕省其母勉慰如成人中夕而疾作遂不救盖若與其母訣也曰興老吾繼室李氏出也卒

時始二歲實治平三年九月甲寅是時余方鎖宿景德寺試國子監進士不得視其疾臨其死也二女生而值予之窮多故其不幸又夭以死所謂命非耶熙寧十年余為洪州始以三月庚申瘞二女於南豐之源頭同穴慶老在右興老在左是為誌

仙源縣君曾氏墓誌銘

吾妹十人其一早夭吾既孤而貧有妹九人皆未嫁大懼失其時又懼不得其所歸賴先人遺休嫁之皆以時

所嫁之者皆良士謂宜皆壽而昌以延光榮於父母家也而十餘年間死者四人先人之盛德也吾妹之懿也曾不章顯於世而天吾故不知夫哭之之慟也諱德操字淑文者吾之第九妹也嫁江都王氏為殿中丞贈尚書屯田員外郎諱某之子婦殿中丞幾之妻封仙源縣君為人柔嫺靜頗動止以儀度平居溫溫一言笑不妄也與人羣居自處者常取其後與人共衣食自與者常取其薄王氏故貧垢衣菲食未嘗以為歎恭大慈小輔

其夫以義無不得其宜者不幸年三十有一以死有子男二人曰某曰某女二人皆幼也曾氏其先魯人今家建昌軍之南豐吾妹為尚書戶部郎中直史館贈右諫議大夫諱某之孫女太常博士贈尚書都官郎中諱某之女卒於熙寧七年三月庚子葬於揚州江都縣東興鄉元豐四年某月某甲子也銘曰

既艱其生又不介之壽維篤於仁尚克臧厥後

元豐類藁卷四十六

欽定四庫全書薈要卷一萬四千六百五

集部

元豐類稿卷四十七

宋 曾鞏 撰

碑

太子賓客致仕陳公神道碑銘

太子賓客致仕陳公既葬其孤眎與其宗親屬人謀曰
公歿所以原大追功既有太史之狀幽宅之銘維墓道
有碑可以明著公之休德遺澤章眎萬世以假寵陳氏

之子孫於無窮而其辭未立於誼謂何迺相與來請於
余余辭不能既不獲迺具論公胄出位序行治之實以
為碑辭而屬之以銘其辭曰惟陳氏其先虞舜之後封
於陳春秋時陳滅入楚其子孫以國為氏世為顯姓見
於記錄至公之先始家南康軍之星子至公又家江州
之德化曰知公曾祖考也曰彥璩公祖考也曰累贈禮
部尚書俊公考也公諱巽字公順祥符八年進士及第
歷常州團練推官盜有棄財走者公以謂不應死通判

不肯用公言是時公起家少年及遇事堅爭不可奪其
守老吏皆驚盜卒得不死以尚書憂去位服除補武安
軍節度推官侍御史李偕守武安事倚公決州賴以治
轉運使陳從易以公為材獄有久不決者皆屬公治之
凡治二十四獄人皆服其平以皇妣嘉興郡太君馮氏
憂去位服除補岳州軍事判官舉監潭州茶米倉天聖
初潭州茶課視景德虧十之六公謹於繩吏而果於去
民之所素不便者茶視舊課歲增九百萬斤用薦者改

祕書省著作佐郎知吉州廬陵縣廬陵人喜關訟械繫
常克縣庭公除其害政者人心大變月餘囹圄空虛而
人自得田里之間樞密副使姜遵常為廬陵民便之至
是有前姜後陳之諺移知資州資陽縣遷祕書丞用薦
者通判戎州州將武人以州任屬公民夷悅附政以大
和遷太常博士尚書屯田員外郎通判潭州溪峒諸蠻
犯約知州事劉夔劉沆繼出行邊公實總州任內脩民
事外奉師費凡輸粟帛金錢四十有八萬兵械稱之用

足於軍而賦役不加於民沆及荆南王居白岳州滕宗諒與湖南北部使凡十有二人請即用公為轉運判官會轉運判官廢故不行遷都官員外郎知撫州恩信行部中奸強擾服貧細得其職遷職方員外郎明堂恩遷屯田郎中賜服金紫去知安州以寬靜順其俗教民通溝洫趨農桑遷都官郎中知蜀州大興學校遷職方郎中太常少卿知蘄州居半歲以目疾請老遷光祿卿致仕始家江州英宗即位遷秘書監今上即位遷太子賓

客公少長間巷能自感發彊志力學為進士一出遂收其科為吏明悟敏捷見義敢為不少屈以求合蓋從事於州郡久之不進而其志彌厲其治於惡人無所貸至其過失則無所不容而於善人惟恐失其所也遇人豁然不為畦畛於其所長未嘗不薦藉成就之於其急難與貧不能自存者未嘗不賑而助之公既好學至於聲音星厯之伎無所不知及退而自休日使家人誦書常數千言危坐聽之未嘗有倦色江於東南為水陸之衝

賓客日湊公廣於招納與之醕酒高會彈琴賦詩曰是
足以佚吾老也及間而言天下之事於其是非得失之
際慨然奮勵少者有所不能及聞其言莫不壯其意少
客京師有欲教公化黃金者公辭不受教公以寡欲乃
受而行之蓋出事天子四十有八年退老於家又十有五
年年八十餘飲食倍人儀狀甚偉聲音滿堂進拜公於
前者不知其已老也前終十餘年自為冢於南康軍星
子縣白鹿原距尚書之兆千有八百步棺槨衣衾皆豫

自製屬疾至終容止如常遺言里中親疎各盡其意享年八十有五歿於熙寧九年五月壬申葬於是年八月壬寅累階至朝散大夫勲至上柱國封至潁川郡開國侯食邑至一千二百戶娶張氏尚書屯田員外郎詡之女封清河縣君再娶王氏尚書都官員外郎告之女封同安郡君子男二人曰耆太廟室長有易疾次即眊也守江州瑞昌縣主簿女五人嫁太常博士文勸進士吳鵬光祿寺丞曾軫進士陶舜儀吉州廬陵縣主簿薛縫

孫男一人曰瓊女三人明承德襲教能世其家者也銘
曰

允穆陳公學繇自力收科於少其髦維持于陪于貳懿
其壯畫于附于顓焯其偉績驅之礫之于其蚤賦膏之

嫗之于其黍稷彼疾而馳我徐不亟寧無爾諧不渝我

則于郎于卿進皆以序疾集于微乃謝而去

按日使家人日字下

舊本有有晚二字晚蓋脫字之訛其下接迺尚書省句
自使字至去字凡四百六十八字俱佚今依顧松齡從

宋槧校正
本補入
迺長書省迺賓宮朝寵則日躋身焉逍遙世

很而爭公裕有之世惴而持公恬處之公有賓事鼓瑟
吹竽公退燕私左詩右書年則大耄氣蓋坐人笑談待
終曾不嘖呻有歸墓隧豐碑螭首勒辭告休尚慰爾後
祕書少監贈吏部尚書陳公神道碑銘

祥符九年九月甲辰祕書少監知廣州陳公卒於位以
聞天子官其二子以慰寵其家天聖中今天子脩先帝
功臣記之於史而太史考公之謀議勞烈於朝訪公之
世族州里官次行治之本末于家以書于冊已又有詔

次其功著之令典布之天下曰維所以寵嘉陳氏之子
孫者其世世無絕嘉祐三年公子三人謀曰吾先人之
所既立記德之史藏於有司褒公之詔傳於天下維墓
有碑後嗣所以載吾先人之休聲美實而久廢不立懼
無以飭其子孫於千萬世以為已羞則相與來乞銘文
以刻於石其叙曰維陳氏其先遠出於舜至周武王之
時陳為舜後媯滿之封國至春秋之際楚滅陳而子孫
之散亡者因為氏族其後居長葛者出於漢太丘令寔

之後唐之晚長葛之陳氏徙南劍州之沙縣公諱世卿
字光遠南劍州沙縣人也曾大父昶大父昂父文餘公
貴贈其父尚書駕部員外郎公為兒時書木葉為詩其
父見之大驚遂使書學以篤志聞於人中熙寧二年進
士為衡州軍事推官改靜安軍節度推官王小波李順
盜蜀州縣多不能保東圍靜安公應變為箭筈兵械城
守之具百餘萬約其屬分城守之圍既久不解分城者
疑懼意懈出語動公公以義譙數勉之而間謂州長張

雍曰此屬留之則潰人心縱之使求外兵則兩全雍聽其言盜數萬人圍靜安八十日公奮勵距敵射其裨將一人應手死又射至數百人無不輒死盜以故不敢迫而外兵來救乃卒解靜安之圍事聞即其軍以公為掌書記父喪不許去官自宋興小吏勢弱盜起往往轉掠數百千里吏輒棄城走及公之保靜安則若吏力皆可以有為者然公之於此時蓋亦以無為有以少勝衆此材智烈大夫之所為小拘常見之人亦安能責其出此哉

公在靜安七年還為祕書郎真宗即位召公欲以補御史而張鑑守廣州乞公自助乃以公與鑑累遷尚書度支員外郎賜緋衣銀魚歷河南府新安縣通判廣州知建州改福建路轉運使又改兩浙入判三司勾院復為荆湖北路轉運使澧州諸蠻奪澧旁地耕守數縱兵入盜積十餘歲莫能却公至諸蠻畏悅皆還就溪洞而歸故所掠地與人公因築武陵澧州二塞以備蠻詔書嘉獎公去久之而後吏不能善蠻蠻亦輒復入盜天子問

公前所以服蠻者何為而今將治之者何出公具對而
刊其藁世故莫知其何術也公在荊湖歲餘擢為秘書
少監知廣州賜金紫服至則罷計口鬻鹽人以休息海
外國來獻多人徒以食縣官而往往皆射利於中國也
天子問公所以綱理之者公以謂以國之小大裁其使
員授官之多少通其公獻而征其私貨可以息弊止煩
從之居南海四年未及召而得疾享年六十有四某年
某月某甲子葬於沙縣之龍山鄉崇仁里母夫人某氏

某縣君繼母夫人蕭氏某縣君夫人羅氏某縣君子五人曰儼尚書比部員外郎曰侃福州古田縣尉曰佩衛尉寺丞曰偉同學究出身曰儼殿中丞佩偉皆早世而儼偁之進於朝累贈公吏部尚書公事繼母行純篤其進膳飲藥物必經手其執喪人恐其不勝哀也遺戒諸子皆人之大節好振人之窮樂獎人之善所薦士後多至大官宰相張士遜公所薦也公常以謂我之所以自著者在行事故不必見於文章所以事上者不求人知

故其於謀議尤多而人罕得而知也噫其可謂自信特立也已其銘曰

允淑陳公生知書學人就其華我居以樸盜驚西土公在圍城隣有破亡公守不傾往眎蠻荆其得孰窺蠻來受職若與為期翼翼蜀州士全純白茫茫楚野人復耕織原念累功進位南伯內治何為與人休息外治何為賓柔荒國允淑陳公文武之特聲載於人實告於冊又慰爾後刻銘墓石

刑部郎中張府君神道碑銘

府君諱保雍字粹之景德二年舉進士中甲科授山陰主簿有能名提點刑獄皇甫選上其狀拜大理評事監尉氏酒踰年知三泉用故事得假五品服專達既至嘆曰吾常所欲為此幾可試也縣以治聞就改寺丞久之通判齊州李丞相迪鎮永興拔府君自贊遂通判其軍府李公去寇萊公代之詔易府君鳳翔萊公雅知其賢因奏留之事有利害未嘗不爭聽乃止璽書獎之遷殿

中丞錢思公惟演李三司士衡薦任佐益州避親嫌不
拜授鄜州遷太常博士尋換晉州今上即位以屯田員
外郎緋衣銀魚知漢州夜中四卒叩府告禁兵兩營變
佐吏輩駭入府府君徐出獨械四卒掠之趨作誣狀徇
兩營以安之至明鞫得實乃四卒與伍中謀幸授已甲
捕兩營因自以為叛遂棄之市及謀者九人因奏言蜀
戍兵久合往往叛可因使臣去來番代之行之至今擢
拜都官還朝莊獻太后面嘉之聯拜職方度支判官契

丹國信使荆湖北路轉運章服金紫有馮異以化黃金
于太后得奉職監鄂州稅知州歐陽穎事之曲恭武昌
置場中市民炭常時吏先署入抄文為足而實尚留民
家不入比漕發乃直取載之以為故穎暴又欲資異謀
使按之坐盜死者十八人當論府君自荆南乘單船六
日夜入鄂直之笞守吏數人而已同時漢陽俚民販茶
得知軍駱與京誣民忤巡檢應首死者二十人隨者百
餘人與京暴甚穎人莫敢相曲直府君遂亂江往慮之

二十人者得不死隨者皆貫漢陽距江為城潦至隄輒
毀歲調薪石發民完之工四千人兩縣以病府君身自
護作省工費半隄完至今遷祠部郎中滿歲更兩浙轉
運使加刑部行部至婺刺得其守罪留治之未既疾作
遂不起明道二年九月五日也享年五十九歲以景祐
二年八月壬申葬汝南宣猷鄉之先塋張氏世為顯姓
府君先居齊之禹城及考諱制官至庫部員外郎贈吏
部侍郎過蔡州樂之家焉府君娶彭城劉氏樞密直學

士師道之姪封本縣君子定察彥博仕有治聲最少彥
輔未仕府君之喪朝廷以察為鄂州推官府君甚愛考
城劉待制劉亦厚結之子娶府君女慶歷三年彥博為
撫州司法為予言府君平生端重不惰燕閒未嘗見其
懈容為治威嚴不撓細事為漢州民趙昌以畫名府君
迄代不問至劒門昌追獻畫一幅曰前太守舉從昌取
又應朝貴人求汲汲昌以技嘗自苦德公不擾敢獻府
君強受之而歸之直其使吳越吳越匠巧天下未嘗致

一器一物歷問其治已雖小者如此又稱其官次施設
狀如前而曰今史館脩撰王質銘其德於壙中校書郎
王安石又序其詩惟所必顯章於墓道之左者其辭不
立懼無以昇四方人視聽請予文張之於碑予不讓銘曰
為天下之道本諸得人公卿內庸諸侯部使者外治
其體兩重也易知矣今常患材難不足布此位故不能
推其功惠及民豈世所謂賢天固嗇邪抑其求弗切耶
盖宜放而登當取而遺其施為繆然也如府君鍾材甚

美而進也得其時自守及使緒行既卓矣使極其設脩
可勝言耶而止於斯其可嗟也已方今敝郡彫部相望
如府君其又可思也已則凡蔡里之耆耄惡得不嚴其
墓耶

故朝散大夫尚書刑部郎中充天章閣待制兼侍
讀上輕車都尉賜紫金魚袋孫公行狀

曾祖恕皇任博州堂邑縣主簿贈太子中舍

祖賁皇任尚書庫部郎中

父從革皇贈尚書職方員外郎

公諱甫字之翰天聖五年同學究出身為蔡州汝陽縣主簿八年進士及第為華州觀察推官華州倉粟惡吏當負錢數百萬轉運使李紘以吏屬公公令取斗粟春之可棄者十纔居一二又試之亦然吏遂得弛負錢數十萬而已紘以此多公薦之遷大理寺丞知絳州翼城縣樞密直學士杜公衍奏知永興軍司錄遷殿中丞樞密直學士張公逸奏監益州交子務遷太常博士慶歷

二年杜公為樞密副使又薦之得試為祕閣校理三年改右正言知諫院因災異言應天所以譴告之意者在誠其行有其誠矣所以順天者在愛其民於是遂請斥浮費出宮女除別庫之私以寬賦歛初李元昊反河西契丹亦以兵近邊謀棄約任事者於西方益禁兵二十萬北方益土兵二十萬又益禁兵四十指揮及羣盜張海郭邈山等劫京西江淮之間皆警是時已更用大臣矣又令天下益禁兵公言曰天下所以大困者在浮費

而浮費之廣者兵為甚今不能損又可益之耶且兵已
百萬矣不能止盜而但欲多兵豈可謂知先後哉不報
於是極論古今養兵多少之利害以聞語詆大臣尤切既
而保州有兵變朝廷賞先言者公以謂有先言者而樞
密院不以時下不可以無責天子曰某吾方倚以治也
不可使去位公猶固請議其罰邊將劉滬謀立水洛城
與部署狄青尹洙議不合滬違其節度遂立之青等械
繫滬以聞公言曰城之所以蔽秦而通秦渭之援宜不

廢其功而赦滬之輒遂從公議燕王薨大臣謂用不足
欲緩葬公言曰燕王上之叔父葬不可以不如禮又言
後宮事又言宰相罪當罷皆行其言上既罷宰相而
用某為參知政事又言某不可任以政天子難之因求
為外官而是時朋黨之議亦已起大臣相次去位公上
書論爭語尤切已而奉使契丹還遷右司諫知鄧州徙
安州又徙江南東路轉運使又徙兩浙遷起居舍人尚
書兵部員外郎改直史館知陝府簡厨傳之費陝人安

之隣州歲時以酒相慶問公命儲別藏備官用一不歸
於已至今遂為法徙晉州近臣過晉夜半叩城欲入公
曰城有法吾不得獨私終不為開門徙河東轉運使賜
金紫服入為三司度支副使輸物非土有者公為變其
法使之代輸至和三年遷刑部郎中入天章閣為待制
遂為河北都轉運使疾不行又兼侍讀嘉祐二年正月
二十一日卒於位公博學強記其氣溫其貌如不能自
持及與人言反覆經史上下千有餘年貫穿通洽不可

窺其際而退跡其家初未嘗蓄書蓋既讀之終身多不
忘也其居官於其大者既可知已於其小者亦皆盡其
意云雖貴而衣食薄無妾媵不飾玩好不與酣樂泊如
也時從當世處士講評以為遂其好而客或造其席者
與之言終日不能以勢利及也其於人少合亦不求其
詳所與之合亦不阿其意蓋公與河南尹洙相友善而
尤為杜丞相所知慶歷之間二三大臣又與同心任事
然至於論保州之變則所指者蓋杜公非益兵之議則


所詆者蓋二三大臣至於城水洛也又絀尹洙而申劉
滄其不偏於所好如此然已而朋黨之議起大臣多被
逐公之爭論尤切亦不自以為疑也噫可謂自信獨立
矣可以觀公之行也所著唐史記五十七篇以謂已之
學治亂得失之說具於此可以觀公之志也公歿有詔
求其書公享年六十其先開封扶溝人至公之祖徙許
之陽翟今為陽翟人母李氏長安縣太君妻某氏某縣
君子宜滑州觀察推官實寘皆將作監主簿宜等以狀

來屬鞏謹序次其實可傳於後世者如右謹狀

元豐類稿卷四十七

謹案卷四十七第三頁後七行日使家人誦書刊
本日下注脫字今據顧松齡校本補入自日使
下至五頁前六行乃謝而去共四百六十八字





總校官進士臣胡榮

校對官助教臣金學詩

謄錄貢生臣江長鎰